

RECTORE MAGNIFICENTISSIMO

SERENISSIMO PRINCIPE REGIO AC DOMINO

DN. FRIDERICO AVGVSTO

ELECT. SAX. HEREDE

PRODROMVM COMMENTATIONIS

DE

CAROLINIS

BOIEMIAE

FONTIBVS

DISSERTATIONE SOLENNI

PRIMA

PRÆSIDE

D. IO. GOTHOFREDO BERGERO

ARCHIATRO REGIO, COLLEG. MED. SENIORE
ET PROF. PRIM.

PRO LICENTIA

CONSEQVENDI SVMMOS IN ARTE
SALVTARI HONORES

P. P.

IO. BENIAMIN POMSEL

PIRNA MISNICVS

A. D. IAN. CIDI CCIIIX.

IN AVDITORIO MAIORI

HORIS ANTE ET POST MERIDIEM SOLITIS.

VITEMBERGÆ, PRELO GERDESIANO.



DE
CAROLINIS
BOIEMIAE
FONTIBVS
DISSERTATIO SOLENNIS
PRIMA

I.



Um multæ res naturales nequaquam satis adhuc explicatæ sunt, tum perdifficilis est & iucundissima pariter ac utilissima quæstio de causis aquarum natura calentium, ut aliarum omnium, ita illarum præcipue, quæ benigniori fato in terris Boiemicis emicant, atque a Carolo IV. Imp.

nomen duxisse memorantur. De quibus cum tam uariæ sint doctissimorum hominum, tamque discrepantes sententiæ, alterum fieri profecto potest, ut earum nulla; alterum certe non potest, ut plus una uera sit. In hac igitur re inuestiganda, ut, ueritatem ipsam si assequi minus possim, cominus tamen sequar, id primo monendum est, quod quidem præterire reor neminem, qui eam regionem, in qua hæ calidæ manant, paulo diligentius lustrauit, in ea uaria fossilia, præsertim pyritæ, ferri & salis cuiusdam nitrosi, eiusque generis saxi calcarii, quod vocatur gypsum, uenas subesse. Nam fertilis est ferri magna pars illius terræ tractus, qui ab oppido Elbogano ad has aquas ducit, nec procul inde sitæ aluminis fodinæ insignem pyritæ, ex quo primo sulphur, ac deinde uitriolum conficitur, copiam ostendunt. Sed propius eam ochra ferri diues, quæ ubique cum his aquis prodit, & pyritæ soboles est, monstrat. Esse autem salis uim magnam eadem in regione, uel hoc magno est argumento, quod pluribus in locis, ac præsertim in rupe oppidi inferiore, unde multæ manant calidæ, sal niueum copiosissimum efflorescat, & cum aquis quoque frigidis inde deducatur.

II.

Notandum est deinde, aquarum illarum calidarum multas ibidem, nec uno caloris gradu scaturire; sed leui quasdam raraque ebullitione prodire, quae quidem temperato & periucundo sunt calore; alias uero maiore ui salire & ita calere, uel feruere potius, ut & elixandis ouis, & deplumandis depilandisque animantibus seruiant, nec sint idoneæ balneis, nisi temperentur, aut deferuescant. Ex his fons est celebris, qui ex propinqua rupe edita, cui nomen est a ceruis, ruentibus aquis, facto per subterraneos cuniculos & subtus Teplam amnem, quem sæpe perrumpunt, transitu allisueque ad obstantes montis fagorum, ut appellant, radices petrosas, ad ipsam amnis illius ripam erumpit, aquas magno fundens impetu bullientibus similes: unde uulgo fons furiosus & feruidus nuncupatur. Exilit is ingenti aquarum murmure, multoque fumo, & arte per tres deductus tubos effunditur, ex horumque uno tanta ui & copia eiaculatur potius, quam emittit aquas, ut, nisi imposita tubo capsula coerceantur, altitudinem proximarum ædium æquare sint visæ. Hic fons communis est & calidissimus, ex quo aquæ & pro potu hauriuntur, & in solia siue balnea tot

numerosa, quorum quippe non uno, sed duobus & pluribus plurimæ ciuium ædes sunt instructæ, deriuantur, & macerandis iumentorum pabulis ac usibus præterea culinariis uberrime sufficiunt.

III.

Huc accedit, ad istam præcipuam scatebram fontes quoque acidos emergere, nec procul ab his alios atque alios, pluresque in ea regione ebullire.

IV.

Ipfas uero has thermas (qua quidem uoce Græci in aquarum natura calentium appellatione utebantur) tenendum est, & in fontibus suis, & quacunque uadunt, ochra sua & uario colore cuncta inficere, & lapidescere, atque crustosum gignere stalactiten, album, rubrum, spadiceum, luteum, & pallidum, figura extus uaria, ac zonis intus crustisque uersicoloribus distinctum, eumque compactiorem & duriorem, quo fonti est propior.

V.

Interest etiam scire, non modo in tubis atque canalibus, & quocunque tandem aquæ hæ delabuntur, tophos eiusmodi & concretiones fieri lapideas, sed etiam delatis in balnea aquis, postquam nonnihil deferbuerunt, cuticulam innasci
albi-

albicantem, tenuem, duram, & insipidam, quæ siccata solo digitorum attritu in puluerem resoluitur; ac parietibus præterea canalium, per quos aquæ decurrunt, exterioribus, & locis aliis, ad quæcunque illæ ueniunt, albam falsamque materiam copiose affigi, eamque alibi etiam ueluti terræ spumam quandam & sudorem uideri.

VI.

Tophum autem istum, uel lapidem stalactiten porro sciendum est, maximam partem gypso, ferro, & sale nitroso constare, saxi autem calcarii ueri, quod ustum in calcem in aquis stridet & feruescit, æstumque excitat, continere nihil.

VII.

Neque ignorandum est, tophum eundem igne, quoad satis est, exustum, affusa aqua odorem excitare grauem, sulphureum & ferrum olentem, aquamue reddi uiridem ac cito cuticula uestiri, simili cuticulæ aquarum in foliis, ac renascente toties, quoties demitur. Quin & traiectam per filtrum aquam ferrum redolere, & aranea quadam uel epidermide uersicolore caudæ instar pauonis obduci, eamque detractam breui restitui. At fugacem esse colorem illum aranæ, & hanc demum in squamulas albas, tenues & duras itidem adolescere.

VIII. Sed

VIII.

Sed redeundum est ad thermas, quas res tam varias gerere diximus. Has enim meminisse debemus ex fonte exceptas, alius instar aquæ limpidas esse & coloris expertes, atque saporem linguæ & palatò imprimere alcalicum, falsum, nitrosum & ferrugineum, offundentem interim per fauces naribus sulphureum quid & fumosum, quod ferrum potius, quam quoduis aliud repræsentat.

IX.

Easdem aquas, fontis, inquam, præcipui & communis, memorandum est, gradus caloris sat uehementis esse, nec tamen eiusdem semper, & quamuis sint feruidissimæ, tamen tuto bibi, nec ita linguam & fauces adurere, ut aqua facit uulgaris, pari ui ignis excalefacta.

X.

Has porro calidas cunctas, ut & Teplicenses, ceterasque omnes terrarum orbis thermas, inprimis nouisse oportet, ualde halituosas esse, atque assidue uaporare, quamdiu uel tantillum calent, uaporesque istos & halitus ferro grauidos esse, & errorem redarguere *Tabernæmontani*, *Fallopîi*, *Solenandri*, *Zwelferi*, & complurium aliorum

aliorum, qui fossilia, ac præsertim ferrum, thermis natura cum mole & corpore, uel entitatiue & materialiter, ut loquuntur, inesse, easdemque constituere, hodieque negant. Nec uera est opinio, qua aquæ naturæ calidæ statuuntur nulla imbutæ substantia minerali, ut de balneis Lucensibus, aquisue in collibus Pisanis, & quibusdam aliis Italiæ, itemque Piperinis Heluetiæ, & nonnullis in Hungaria, alii ex aliis memorare solent. Erratque *Plinius*, cum omnes calidas medicatas esse negat.

XI.

Iam illud quoque animaduertendum est, aquas illas ad libram circiter modo ex fonte haustas, iniecto tantillo pulueris gallarum, ad duo puta, triaue grana, ilico purpurascere, hoc quidem magis, quo sunt calidiores, & colorem hunc omnem abire cum calore, & primo in iucunde uiridem, ac demum in aureum uel succineum permutari.

XII.

Sed siue caleant aquæ, siue frigeant, sciendum est, eas infuso oleo tartari per deliquium, aut sale simili liquato, sine lucta in modum emulsionis lactescere, syrupum autem uiolaceum, ut & brassicæ rubræ succum uiridem & herbaceum

reddere, tincturam rubram ligni Brasiliensis exaltare, cœruleum heliotropii colorem, ab acidis mutatum & rubentem instaurare, & solutionem mercurii sublimati colore mali aurei præcipitare, hoc certe citius & melius, quo magis exhalata aqua fuerit.

XIII.

Obseruandum est præterea, easdem aquas amice misceri cum solutione falis petrae & communis, itemque cum spiritu falis ammoniaci, & salibus aliis uolatilibus : ex fale ammoniaco autem falem liberare uolatilem, & cum solutione uitrioli non sine conflictu & multa præcipitatione confundi, nec minus argentum ex aqua forti, quam ex aqua regia aurum deturbare, & cum acidis omnibus uehementer agitari, atque a spiritu sulphuris uel uitrioli saporem recipere acidularum æmulum.

XIV.

Neque prætereundum est, exhalatione libræ thermarum unius sedimentum relinqui albidum, non drachmarum trium cum semisse, sed drachmæ tantum dimidiæ, idemque ferri non expers esse, & iterata solutione falem præbere crystallinum, non drachmarum duarum, sed granorum

norum circiter 25 uel 26 in tenues longasque nitri sturias cum intextis salis communis cubis, qui ab illis facile segregantur, eleganter extensum, saporis penetrantis alcalici, falsi, & cum amarore quodam refrigerantis, siue nitrosi; relicto in filtris puluisculo albo, eiusdem naturæ gypseæ cum innatante aquis in balneis & solutionibus topthorum ustorum cuticula.

XV.

Eodem uero sale notandum est, omnia phænomena, quæ thermarum ipsarum cum rebus uariis mixtione fieri iam modo dictum est, melius euenire, atque ex aqua regia aurum uehementer fulminans præcipitari, ex solutione uero uitrioli-sal quoddam acido-alcalicum, siue falsum, nitri uitriolati æmulum, acquiri.

XVI.

Ejusmodi salem scire licet etiam in thermis Bathoniensibus Angliæ, nec non in Borboniensibus & Vichiensibus Galliæ, itemque in Aquisgranensibus, pari fere proportionem, scrupuli nempe unius & paucorum granorum, in libra una aquarum deprehendi, atque a doctissimo *Listhero* salem uocari calcarium, a Philosophis uero Parisiensibus ad nitrum uerum ab antiquis de-

scriptum & inter salia alcalia referri, quod magnam cum salibus herbarum fixis cognationem habeat. Ejusdem generis sal reperitur etiam in thermis Teplicensibus, sed quantitate longe minore. Neque enim ultra drachmæ dimidium salis ex libris sex illarum aquarum obtinetur.

XVII.

Sed nolim, illum salem haberi pro purissimo alcali, ope ignis ex calcinati saxi calcarii & salis cuiusdam acidi uitriolici copula enato. Neque profecto opus est in terris fornace quadam calcaria ad procreanda salia alcalia, uel fixa, uel uolatilia, cum horum utriusque generis salium illis quoque locis, ubi ne suspicio quidem caloris, nedum ignis fortissimi, terræ sint feraces, aliæ tamen magis aliis, ut inter ceteros Philosophi Parisienses, *Boyleus*, *Tournefortius* & *Leeuwenhoeckius* annotarunt.

XIIIX.

Existimarim potius, salem illum thermarum terræ nativum & ἀπυρον prorsus esse, seu ignem non expertum, de illiusque profapia salis, de quo ita *Martialis* :

*Rusticus es, nescis, quid græco nomine dicar,
Spuma uocor nitri, dicor & Aphronitrum.*

XIX. Nec

XIX.

Nec obesse quidquam potest, quo minus eum salem referamus ad nitrum ueterum, id quod a nonnullis falso asseritur interiisse. Hoc enim in Asia & Aegypto passim reperiri, & adhuc dum etiam uilissimo uendi pretio, præter *Gomesium* & *Boyleum*, ostendit *Tournefortius*, cui quidem illud cum sale ex terris in Gallia sine igne extracto propemodum conuenire uidetur.

XX.

Ac plura constat nitri genera pro humi natalis diuersitate fuisse apud ueteres, & hodieque in his aliisque regionibus extare. De cuius generis nitro intelligendus est locus *Proverb. XXV. 20.* quando is, qui acetum nitro affundit, idem facere dicitur, ac ille, qui cantat carmina cordi pessimo. Exasperatur enim aceto nitrum, quod de halinitro, seu sale petræ, quod hodie nitrum uocatur, dici nequit.

XXI.

Hunc uero salem petræ non alius crediderim originis, neque adeo solis & aeris, sed terræ foetum & filium esse, arte & coctione purgatum. Et uæ tam decantato nitro aereo, & igni, qui eo alitur ac sustentatur, illorumque uitæ, quorum

spiritus ab illo nitro pendet, si eius materia in gremio terræ deficiat.

XXII.

Originem aquarum, quibus constant hæ thermæ, nihil opus est, ut e longinquo ex ipsoque oceano contra staticæ leges per subterraneos canales arcessamus. Propior est uia ex propinquo flumine Egra, neque a ratione alienum, quod quidam obseruatione curiosi hominis constare uolunt, aliquam eius fluuii portionem alicubi se subducere, & subire terram, occultisque illuc uis commearé, unde ipsi fontes Carolini oriuntur. Sufficere quidem uel soli imbres cum rore & solutis niuib. alendis his conseruandisque aquis possunt. Omnino pro explorato habendum est, & uel ex murmure strepituque ruentium aquarum constat, eas ex rupe ceruorum satis celsa riuorum instar per rimas saxorum, tanquam canales quosdam, præcipitantes, & quia deuoluuntur, pressas, maximam partem sub monte arcis, quem appellant, progredi, & superatis uicini pharmacopolii ædibus, itinere cursuque recto altius penetrare terram, factoque per latebras saxorum & subtus Templam transitu, ad radices obstantis saxi allisas, qua data uia propelli, & uel noua sibi itinera facere,
uel

uel per apertas iam fauces impetu lapsui pari euehi & profilire.

XXIII.

Recte & perite *Plinius* cum *Aristotele* tales esse aquas dixit, qualis terra, per quam fluunt.

XXIV.

Perperam uero & imperite *Paracelsus* aquas, statuit, a Deo initio rerum calidas alias, alias frigidas conditas, ac dissolutas deinceps segregatasque fuisse. Cum enim illæ simul atque ex loco calido emanarunt, refrigerant, id quidem ipsæ uidentur indicare, se primo frigidas fuisse, atque a causa quadam calefaciente calefactas, remota ablataque eadem, ad suum genium redire.

XXV.

Inscienter etiam *Solenander* pariter de his, quæ terra fiunt, ratiocinandum esse iudicat, atque de iis, quæ foris eueniunt, quo uidelicet persuaderet facilius, aquas suppositis ignibus in terris incalescere eo modo, quo in ahenis in foco excoquantur.

XXVI.

Quæ uetus quidem *Empedoclis* opinio *Vitruuium*, *Agricolam*, *Baccium*, plurimosque alios assecclas habet, sed tum demum cum ratione admit-

admittetur, cum demonstratum prius fuerit, ignem eiusmodi in terris existere.

XXVII.

Ignem centralem ab ipso mundi exordio tellure abditum, atque ad sublunaris naturæ conseruationem per canales pyragogos exhalationes spiritusque igneos quaquauerfum diffundentem, hisque fontes tam calidos, quam frigidos efficientem, a *Kirchero* pictum quidem, sed & fictum nouimus.

XXIIX.

Neque uero minus ignes *Bottoni* & aliorum, alibi sub terris accensi & flagrantes, ficti sunt, quamuis non sint picti.

XXIX.

Qui pro effectum illorum ignium, aut eorundem spiraculis & caminis montes habent igniuomos, locaque alia ardentia, non plus iis uident, qui collem illum, ut ab *Agricola* uocatur, ardentem, non procul a *Falconauia* oppido, duobus circiter milliaribus distantem a fontibus *Carolinis*, uel pro spiraculis latentis sub illis fontibus ignis, aquasue calefacientis, uel saltem pro eius argumento habent. Ac male ab eodem colle magna olim mala metuit *Balbinus*, metuensque nimium
male

male audiuit, *subterraneos ignes uiscera montis depasce, tantumque intus murmur uentorum, aut flammarum exaudiri, ut paruum quendam Vesuium ipse sibi timor cogitatione depingat.* Aut enim propius collem intuenti metus ignis subterranei omnis euanescet, aut idem pluraque fortasse pronuncianda erunt de planitie illa prope oppidum Schmidebergam uena pyritæ atramentosi seu uitrioli diuite, & uix duobus Vitemberga lapidibus distante, siquidem eam æstiuo tempore uiderit, quam quippe æstu feruere deprehendimus, nec raro manifestis ignibus ita exarsisse constat, ut multas sibi infixas arbores radicitus exusserit.

XXX.

Neque profecto naturam ignis intelligunt, qui cum terris opertum, & in abscondito, ubi nulla aeri spiracula, nullique fumo & flammæ exitus patent, continenti flagrare incendio arbitrantur.

XXXI.

Atque lis adeo inanis est de fomite & pabulo illius ignis, locoque, ubi ardeat, bitumine alatur, an sulphure, & intra, an extra canales & alueos accensus & flagrans, aquas calefaciat, cum nusquam sub terris existat.

C

XXXII.

XXXII.

Nec est, quod quis cum *Virgilio*, *Servio*, *Iſiodoro* & *Aldrouando* existimet, in cauernis *Aetnae* & speluncis sulphure plenis agitatione uentorum ignem ex sulphure accendi. Eadem est ratio accensionis ignis in montibus locisque ardentibus aliis, a uentis subterraneis, a concitato aquarum cursu, uel undecunque orientibus. Ac nunquam aere uentisque concitatum uehementissimis bitumen uel sulphur commune inflammabile inflammabitur & accendetur.

XXXIII.

Et si uel ignis *Kircheri* centralis, uel tot sub terra sunt ignes, quot sunt thermæ, locaque alia calentia, & manifestis flagrantia ignibus, mirandum est, tamdiu mundum stetisse, nec dudum igni deletum fuisse.

XXXIV.

Subducto autem exploſoque igne subterraneo, necesse est, antiqua corruat opinio *Democriti*, qui saxo calcario in calcem uſto aquas incalescere uoluit. Ac tutior adeo usus thermarum, & minus uerendum erit, ne loca illa, in quibus thermæ sunt, exuſta, calcis uiuæ more in aquis dissoluant aliquando, dissolutisque compagibus confideant tandem & concidant.

XXXV.

XXXV.

Ista aquarum efferuescentia calcaria haud multo meliores sunt concurfiones conflictusque salium contrariorum, acidorum & alcalium, aut salis cuiusdam acidi sulphurei, uitriolici, uel aluminosi, actiones in terras sulphureas & bituminosas, uel uenas etiam, siue mineras martiales, atque uenereas, a quibus causam caloris aquarum alii repetunt. Nihilque his prodest, quod omnia thermarum Carolinarum contenta cum acidis confligant.

XXVI.

Quamuis autem in uisceribus terræ, quæ iam ubique fere a tot seculis proscinduntur, nusquam ullæ flammæ, ullæ prunæ, aut quomodo-
cunque accensi ignes ad hoc usque æuum compa-
ruerint, nec minus commentitiæ sint omnes præ-
dictæ efferuescentiæ subterraneæ: tamen calor in
terra gliscit, non omni quidem terræ, aut cuicun-
que ipsius parti unus idemque, sed diuersus, ma-
ior, aut minor, cum alibi multis in locis, præser-
tim in Campania, tum in fodinis quibusdam Mis-
niæ & Bohemiæ, non procul Thermis Carolinis,
in quarum illis uenas metallorum non ita pridem
actu calidas, imo feruidas inuenimus, igne ibi
quamuis nullo.

XXXVII.

Vbicunque uero calor subterraneus, uel ipse ignis ex terra emicans se manifesto prodit, ibi certum est, subesse pyriten, quod non commentis opinionum, sed experientia & exemplorum testimonio nititur.

XXXIIX.

Pyrites (Græcum quidem illud uocabulum, sed receptum usu a Latinis, Arabibus Marchasita, Germ. Kies) ab effecto nomen habet, hoc est, ab igne, quem uel ferro lapideque percussus, uel accensus plurimum reddit. Unde *Plinius* refert Romanos uiuum hunc lapidem appellasse. Sed fallitur, cum eoque multi, qui scobem pyritæ digitis strictum eosdem urere perhibent; nisi intellectum uelis pyriten arsenicalem, qui aeri aliquandiu expositus, propter coniunctum uenenum digitos arrodit, uti metallicis constat.

XXXIX.

Pyrites uulgo lapis uocatur metallicus, quod aurum, argentum, æs aliaque continet metalla; & durus est alius, alius mollis & friabilis, colore, figura, contentis uariis, atque secundum metallorum & fossilium aliorum, quæ completitur, uarietatem, in uaria genera dispescitur.

XL.

XL.

Omnis autem pyrites, siue aliorum sit particeps metallorum, siue sterilis habeatur, sulphure constat & ferro, proptereaque ualde halituosus, & caloris incendiorumque omnium subterraneorum una & communis est causa.

XLI.

Neque uero ullum datur fossile, quod uel intra, uel extra terram calorem ignemque sponte concipit, quin pyriten admixtum coniunctumue habeat. Nam sine ipsius halitu nec sulphur, nec bitumen, nec alumen, aut æstu solis, aut agitatione uentorum, aut suapte sponte accenditur.

XLII.

Quo magis pyrites sulphure abundat & ferro, hoc facilius calorem & ignem concipit, ac centiusque diutius ardet, sine lignorum carbonumue subministratiōe.

XLIII.

Nec tamen ubiuis locorum, quibus subest pyrites, se calor uel ignis prodit.

XLIV.

Sed ubicunque pyrites motu & actione sulphuris sui in suum ferrum, quæ ambo natura confociata & coniuncta pyriten constituunt, feruet,

atque in halitus dissoluitur copiosos, ibi calor regnat actuque deprehenditur, hoc quidem uiuidior & acrior, quo magis feruet pyrites & spirat, halitusque mittit copiosiores. Et tales fuerunt uenæ metallorum, quæ in fodinis actu calidæ, imo feruidæ, a quibusdam, nec ita pridem a nobis sunt deprehensæ.

XLV.

Vt halitus pyritæ plus minus dispersi calorem efficiunt sub terris uarium: sic magna copia congregati, coacti & collisi, incenduntur demum, ignemque in rebus ad eum concipiendum aptis succendunt, & suorum angustias carcerum ui conceptorum seseque pandentium ignium concutendo, non minus incendiorum subterraneorum, quam terræ motuum fabri & auctores existunt. Ita uero subortum repente incendium necesse est, uel extinguatur protinus & suffocetur, uel fractis repagulis, per hiatus terræ respiret, igneque manifesto, & fumis flammisque se prodatur, ut uideamus in montibus Aethna, Vesuuio, Hecla, collibus Leucogæis & locis ardentibus aliis.

XLVI.

Hi porro halitus non solum peruadunt interiora terræ, sed etiam extra eam efferuntur, & fa-

salia resque alias ipsaque uenena ad superficiem illius & ipsum in aera prouehunt.

XLVII.

Atque hinc existunt etiam, quæ per æstatem errantes flammulæ noctu in campis locisque uliginosis accensæ micant, quas uulgo ignes uocamus fatuos.

XLIX.

Nec raro isti halitus causa sunt uentorum, qui, ut ait Poeta :

*Qua data porta ruunt, & terras turbine
perflant.*

XLIX.

Idem halitus una cum uaporibus aqueis, nitro-
sis & uariis aliis, in sublime elatis, aerem alunt,
in nubesque se induunt, ac inter eas compressi,
& accensi expressique, tonitrua, fulgura & ful-
mina pariunt.

L.

Neque profecto aliud est, recte ait *Plinius*, in
terra tremor, quam in nube tonitruum.

LI.

Perbene idem : Fulmina & fulgura sulphuris
odorem habent, ac lux ipsa eorum est sul-
phurea.

LII.

LII.

Optime Saxoniae ornamentum *Georgius Agricola* : Omnia atramenti genera, quorum origo est pyrites, odorem eius, quem emittit fulmen, expirant, sed omnium acerrimum foris.

LIII.

Ferro plueret nil noui est, nec rationi contrarium. Id uero ex pyrite est.

LIV.

Eodem uero iure hoc ferrum dixeris nubigenum, quo uulgo nitrum, quod in muris & parietibus efflorescit, aut si quod uolitat in aere, uocatur aereum.

LV.

Quo magis aer halitibus pyritæ abundat, hoc & ipse est calidior, & nostra corpora calidiora reddit. Illæ enim sulphureæ particulae, corpore calido receptæ, cordis perpetua compressione rotationeque in angustissimis uasis feruorem illum concipiunt, quo eadem sparsæ, & late atque tenuiter admodum per aera diffusæ, carent.

LVI.

Vt uero æstuans pyrites & uaporans suorum feruore iaculorum rebus sub terra aliis : sic etiam

iam aquis, quæ uenas illius perluunt, calorem impertitur, & thermas efficit.

LVII.

Ac thermæ adeo omnes pyriten exhalant, & ochram, pyritæ sobolem, gerunt & deponunt.

LIX.

Hocque thermæ aliæ alias calore præstant, quo pyrite sunt ditiores, magisque uaporant, ut clare in thermis Carolinis & Teplicensibus patet.

LIX.

Neque aliam esse thermarum omnium ceterarum originem, & locorum, quibus saliant, & contentorum, quæ thermæ uehant, ratio ostendit.

LX.

De thermis Bathoniensibus Angliæ id egregie ostendit *Listherus*. Aut enim omnis mea me fallit opinio, aut intelligo clare, neminem unquam de calore thermarum aliquid fide & plausu dignum scripsisse, præter unum hunc uirum præstantissimum, quem miror a popularibus, inprimisque a doctissimo *Guidotto*, qui sine causa ab illius sententia abiit, minoris fieri, ac merita eius postulare uideantur.

D

LXI. Pul-

LXI.

Pulcherrimum omnium experimentum, quo ad declarandam causam incendiorum, & tremoris terræ, calorisque thermarum utitur Dn. *Le Mery*, est præparatio croci martis aperientis ex partibus æqualibus pulveris sulphuris ferrique limati, cum aqua frigida in pastam redactis. Ea enim paucarum spatii horarum non solum uehementer incalescit, ut uix fictile, quo continetur, manu tangi possit, sed &, si paulo maior fuerit utriusque materiæ copia, in luculentum ignem flammamque erumpit, ferro in crocum copiosum abeunte. Quo tamen experimento neque ipse, quem dixi, autor, neque alii recte utuntur, quando ab acido sulphuris, uti loquuntur aliqui, uitriolico, aquis soluto, agenteque in terram bituminosam & sulphureas martiales mineras, & incendiorum subterraneorum & caloris aquarum causam falso repetunt. Illud, opinor, clare liquet, nullam eos pyritæ, a quo illa omnia pendunt, intelligentiam habere.

LXII.

Non tantum pyrites origo est thermarum, sed fontium etiam acidorum, seu, quas uulgo uocant, acidularum.

LXIII.

LXIII.

Nam ex pyrite eroso & deferuescente atramentum oritur metallicum, miseos, chalcitis & foreos nominibus distinctum, ex eoque aqua profluente soluto nascuntur acidulæ.

LXIV.

Vnde in acidulis etiam est pyrites, sed erosus, siue in atramentum mutatus metallicum, adeoque diuersus a pyrite æroso Plinii, qui nondum est erosus.

LXV.

Nil itaque mirum, si iuxta Carolinas, locisque aliis, ubi sunt thermæ, etiam acidulæ reperiuntur.

LXVI.

Ex his uero intelligitur, nil causæ habuisse *Schmutzium*, quamobrem thermas Carolinas uoluerit primo esse acidulas, easque ad loca subterranea ignea accedentes, inibi & concalescere, & naturam nomenque mutare.

LXVII.

Recte *Matthiolus*: Chalcitis etsi rara habeatur in Italia, & in aliis fortasse regionibus,

D

2

repe-

reperitur tamen optima & copiosa in Misnia Bohemiæ contermina quibusdam in metallis, ubi æs & chalcanti minera foditur, una cum misy, sorry & melantheria. Hæc enim ita hodieque in Saxonia & Misnia deprehenduntur, licet uulgo ignorentur.

LXIIIX.

Ex pyrite eroso, siue atramento metallico, in ære atramentum germinat futorium, Græce dictum χαλκανθρον, uulgo uitriolum. Idque, facta paulatim germinatione, pilorum instar pullulat, & uocatur trichites, seu capillare, aut humore, qui eo perlatus est, aqueo solutum, stillando in crystallos, stiriarum instar & lanceolarum, concrefcit, & τὸ σαλακτὸν καὶ λογχωτὸν nominatur.

LXIX.

At præter pyriten, nulla est uena ferri uel cupri, ex qua natura fiat uitriolum.

LXX.

Hoc igitur falso ab *Helmontio Angeloque Sala* gigni dicitur ab aduena fale quodam esurino, uel spiritu acido, peruadente terram, aquasue ita exacuate, ut uenas ferri uel cupri, quas pertrans-
eunt,

eunt, arrodant & dissoluant, eoque modo efficiant uitriolum, quo in officinis chymicis cum spiritibus acidis ex limato ferro uel cupro uitriola arte fiunt.

LXXI.

Sed minus est mirandum hæc talia uulgo statui, cum uix aliter, nisi ipsis naturæ uisis operationibus, possint cogitatione comprehendi. Quibus motus causis *Galenus*, in Cyprum nauigabat uidendorum, quæ in ea sunt, fossilium gratia, & quo tempore ibi diuersabatur, fodinas æreas montium Solorum diligenter frequentabat, & multa notabilia, quæ ad calorem pertinent subterraneum & generationem uitrioli, obseruabat, quæ in his quoque terris cuncta reperiuntur, & sine quibus generatio neque thermarum, neque acidularum, neque uitrioli potest intelligi.

LXXII.

Neque in thermis, neque in acidulis ipsum inest maturum uitriolum: utrisque uero continentur principia uitrioli.

LXXIII.

Satis quoque ex iis, quæ hucusque in medium
D 3 sunt

sunt adducta, colligi potest, principia thermarum Carolinarum esse aquam, eaque solutum sale nitrosum, cum ramentis gypsi, & halitu pyritæ, qui sulphure ferroque constat.

LXXIV.

Neque adeo mirandum, thermas istas tantopere lapidescere, cum semina concretionis lapideæ, uel, si uocula ludere uelis, spiritum quendam lapidificum contineant.

LXXV.

Nec tamen propterea refugiendus est usus harum thermarum, de quarum effectis in corporibus nostris illud abunde constat, eas intus sumtas nihil obesse uentriculo, & facile citoque ductus uasque pertransire, & quanta satis est, copia potas, aluo & uesica meatibusque cutis, nulla uirium diminutione, & sine torminibus reddi, multaque afferre commoda, siquidem recte usurpentur, ut in posterum amplius exponetur.

SOLI DEO GLORIA!

